

Миргүл тағы да үздік шықты

«Еңбегі жанған арулар» республикалық конкурсының облыстық кезеңінде Арқалық қалалық мәдениет сарайының көркемдік жетекшісі Миргүл МҰСАБЕКОВА «Мәдениет» номинациясы бойынша жеңімпаз атанды.

«Еңбегі жанған арулар» республикалық конкурсы «Қазақстан Республикасының іскер әйелдері ассоциациясының» 25 жылдық мерекесіне орай ұйымдастырылған болатын. Конкурс үздіктері 90 қатысушының арасынан: қызмет көрсету, сауда, микробизнес; АӨК және облыстық кәсіпорындар; мәдениет, білім беру және денсаулық сақтау сынды үш бағыт бойынша анықталды. Осы үшінші бағыт бойынша Арқалық қалалық мәдениет сарайының көркемдік жетекшісі Миргүл Бектепбергекқызы «Мәдениет» номинациясының үздігі деп танылды. - «Қазақстан Республикасының іскер әйелдері ассоциациясының» 25 жылдық мерекесіне орай ұйымдастырылған «Еңбегі жанған арулар» байқауында:

«Мәдениет» номинациясы бойынша жеңіске жеттім. Еліміздің әр саласында жұмыс істейтін нәзік жандылардың мәртебесін көтеру, олардың кәсіби жетістіктерін насихаттау мақсатында өткізілген бұл шара тағы да менің шығармашылығымға серпіліс бере отырып, әрбір жетістігім келесі жеңісіме бастама болды. Сүйікті Арқалығымның атын шығарып, қуантып отыру менің бір мақсатым секілді. Маған сенім артқан ата – анама, әріптестеріме, достарыма, туған – туысқандарыма ризашылығым шексіз. Жеңісті күндеріміз көп болсын, - дейді Миргүл МҰСАБЕКОВА.

Миргүл аз уақыт ішінде осымен екінші жетістігіне жетіп отырғанын айта кетейік. Аяқталған жылдың соңында ғана ол - Елбасы Н. Ә. НАЗАРБАЕВТЫҢ : «Рухани жаңғыру» бағдарламалық мақаласын іске асыру мақсатында ҚР Мәдениет және спорт министрлігі ұйымдастырған мәдениет және өнер саласы қызметкерлерінің : «Рухани қазына – 2020» байқауына қатысып, жалпы 256 үміткердің арасынан, өзі бақ сынаған номинация бойынша 80 адамның ішінде жеңімпаз болып; «Үздік қалалық мәдениет қызметкері» атанған болатын.